

# 1 Pita

## Pita'ma Ese Avonkre'nea Naneke

*Anumzamofa vea maninonku knare tavutava nehuta, knare'zama erisunku avega antesune*

<sup>1</sup> Hagi nagra Pita'na Jisas Kraisi aposol ne'mo'na, Anumzamo'ma huhampri tamente'nea naga'motma, mopatmi atretma panini hutma Pontusi kazigane, Galesia kazigane, Kapodosia kazigane, Esia kazigane, Bitinia kazigama fretma vu'naza naga'motarega ama avona kreneramue. <sup>2</sup> Anumzana Tafatimo'a, ko antahino keno hu'nea kante, Ruotge Avamumo tamazeri agru hu'nea naga'mota, Jisas Kraisi amage'ma antageno, korama'a tagitreno sese huramante'nea nagamotma, asunku'zane rimpa fruzamo'a tamagrane aviteno mesie.

*Mani vava asimu'ma erisuna zanku amuhama hanuna zamofa naneke*

<sup>3</sup> Hagi Ranti Jisas Kraisi Nefa Anumzamofa agi'a erisaga hanune, Agri'a tusi'a asunku'zamo higeta, tagu'a rukrehe hunkeno kasefa tasimura tamigeta, Jisasi'ma friteno oti'nea zankura amuhara nehune. <sup>4</sup> Ana kasefa tasimu erisanti hare'nunana, vaga oreno, havizana osuno, fananene osaniaza monafinka Anumzamo'a anteramante'ne. <sup>5</sup> Tamagra Anumzamofonte tamentinti hazageno, Anumzamo'a hanave'areti kegava huramante'neankita, so'e hutma manigahaze. Tamagri tamahokeno tamaza hunaku retro huntogeno me'neankino, e'i

anazama haniana mona mopa vagamare'nea knazupa eama hugahie. <sup>6</sup> Anazama erisaza zankura muse nehazanagi, ama atupa knafina ruzahu ruzahu knazama e'nerisageno, <sup>7</sup> ana knazamo'a tamentintimofona azeri ama huno, golima tevefi kre agru huno azeri hentofaza hiankna nehiankino, tamentintimo'a goli'a agaterene. E'ina hu'negu ruzahu ruzahu knazama e'nerisageno, tamentintimo'ma hanavematino mesiana, Jisasi'ma eama hania knazupa, husga huramanteno, ra tamagia tamigahie. <sup>8</sup> Hanki tamagra Agrira onke'nazanagi avesinentetma, menina Agrira onkenazanagi, Agritera tamentinti nehuta, tusi musenkase hunteta agi'a erisaga nehaze. <sup>9</sup> Tamagrama tamentintima hanaza zamofa mizama'a, Anumzamo'a tamagu tamamena tamagu vazigahie.

<sup>10</sup> Hagi ama ana tahokeno taguvazizana, korapara mago'a kasnampa vahe'mo'za asunkuzamo'ma tamagrite'ma esigura kasnampa kea nehu'za, antahige'za rezagane so'e hu'za ke'naze. <sup>11</sup> Kraisi Avamumo zamagripi mani'neni, Kraisi'ma atama eriteno, ra agima erisia zankura zmasami'ne. Ana nehige'za zamagra Kraisi'a inankna Ne'mo, ina zupa efore hugahie hu'za hu'naze. <sup>12</sup> Zamagrite'ma eriamama hiana zamagra'a zamaza nosazanagi, tamagriku Knare Musenkema huama hazafina, monafinti'ma e'nea Ruotge Avamumofa hanavere huama nehaze. Ankeri vahe'mo'za anama huamama hzazama kesagura, tusiza huno zmavesi'ne.

*Mani ruotge huta manisnunku Anumzamo tagi hu'nea naneke*

<sup>13</sup> E'ina hu'negu retro huta antahintahitama nemanita, tamavufgamofu avesizana kegava negritma, ana miko amuha zantama, Jisasi'ma eama hanigeno, Anumzamo'a tamaza hania asunkuzante anteho. <sup>14</sup> Ke amage'ante mofavremo'za nehazaza nehutma, koma ontahinetma hu'naza tamavutamavamofu avesizana ovaririho. <sup>15</sup> Hianagi Ruotge Hu'nemo'ma tamagima hu'nea ne'kna nehuta, maka'zama hanafina mani ruotge hiho. <sup>16</sup> Na'ankure anage huno avontafepina krentene, ***Tamagra ruotge huta maniho, na'ankure Nagra ruotge hu'noe.*** (Lev-Pri 11:44-45) <sup>17</sup> Tamagrama hutma nerafa'e nehaza Anumzamo'a, Agra magokemofonkuke osu Anumzankino, maka vahe'mo'za zamavuzmavama nehazare refkoa huzmantegahie. Ana hu'negu, ama mopafima zoka vahekna huta atupa knafima mani'nenarera, Anumzamofonku kore hunentetma ra agi amiho. <sup>18</sup> Na'ankure tamagrama ketma antahitama hanazana, korapa tamagehe'za zamaza osu zamavu'zmava nehaza kante nevazagu, anampinti mizaseramante'ne. Miza seramante'neana haviza nehiazanu, silvane golireti miza seoramante'ne. <sup>19</sup> Hianagi haviza osuno afuhe omne sipisipi anenta, Kraisi korana marerisa mizanteti mizana seramante'ne. <sup>20</sup> Na'ankure korapa Anumzamo'a, monane mopane tro osu'neni, tazama hanigura Kraisi huprinte'ne. Hianagi menina vagare knafina tamagri'ma tamaza hanigu efore hu'ne. <sup>21</sup> Kraisi

taza higeta, fripinti azeri otino husga hunte'nea Anumzamofontera tamentintia nehune. E'ina hu'negu tamagra Anumzamofontera tamentintia nehutma, amuhara nehaze.

<sup>22</sup> Tamagrama tamage kere'ma amagama antetma nevazazamo, tamazeri agru tamagu tamena higetma, neramafuma ovesinte avesinte tamagu'areti nehutma, tamaguareti hutma mago magomota ovesinte avesintea nehaze.

<sup>23</sup> Na'ankure tamagra kasefa'ma hu'nazana, haviza nehia avimazanteti rompage, haviza osu avimzama Anumzamofu mevava kea asimu me'nea ke'areti kasefara hu'naze. (Jon 3:1-9)

<sup>24</sup> E'ina hu'negu avontafepina anage hu'ne, ***Maka vahe'mo'za trazankna hu'nazankino, maka konariri zamimo'a trazamofu amosregna higeno, ana trazamo hagege higeno, amosre'amo evuramiankna hugahaze.***

<sup>25</sup> ***Hianagi Anumzamofu nanekemo'a mevava hugahianki'za,*** ama'i ana naneke huama hu'za tamasami'naze. (Ais 40:6-8.)

## 2

### *Kasefa mofavregna huta mani'nuna naneke*

<sup>1</sup> Hagi e'ina hu'negu tamagra vahe'ma azeri havizahu avu'avazane, havige hu'zane, tavrenke hu'zane, kenunu hu avu'ava'zane, vahe'mofu amefi ke hu'zana netretma, <sup>2</sup> meni kasentea mofavremo aminku avesiankna hutma Anumzamofu kegura tamavenesita, Anumzamofu agru hu'nea nanekea e'neritma nena hugahaze. Ana nehanageno tamagu vazino'ma, tamahoke ahe'nea zampina nena

hugahaze. <sup>3</sup>Hanki e'inama hutma Anumzamo'ma so'ema huneramantea zamofa haga'ama erisuta, Ramo'a so'e hu'ne hutma hugahaze.

*Jisasi'a asimu eri have mani'nea naneke*

<sup>4</sup>Hagi Kraisi'a asimu eri have mani'nemofonte tamagra Agrite neaze. Ana havea vahe'mo'za haviza hu'ne hu'za eri atrenazanagi, Anumzamo'a huhamprintegeno, Agri avurera mrerisa have me'ne. <sup>5</sup>Tamagranena asimu eri havegna hu'nazageno, avamupi mono nona kiazza nehigetma, avamupi ruotge pristi vahe'mofo nonkna nehutma, Anumzamo avesi'nea ofa Jisasimpi avamupina hunentaze. <sup>6</sup>Na'ankure anage huno avontafepina me'ne, ***Keho Zaioni agonarera marerisa have huhamprintoankino, nomofo renagentete azeri hanaveti have me'ne. Hanki iza'o Agrite'ma amentinti hanimo'a, agaze osugahie hu'ne.*** (Ais 28:16.)

<sup>7</sup>Hanki tamagrama tamentintima haza vahe'motarera, ana havemo'a mrerisa have me'ne. Hianagi iza'zo zamentintima nosaza vahetera, ***Nogi vahe'mo'za zamavresara higeza atraza havemo'a, nomofo renagentepinka azeri hanaveti have fore nehuno,*** (Sam-Zga 118:22) <sup>8</sup>***zamagigo zamino zamazeri tanafa nehuno, zamazeri traka hu have fore hu'ne.*** (Ais 8:14) Na'ankure zamagra trakama nehazana, ke'arera amagera nontazanki'za, traka hu'za haviza hugahaze.

<sup>9</sup>Hianagi Anumzamo tamagrira huhamprira-mante'nea naga mani'neta, kinimofo pristi naga

mani'neta, ruotge hu'nea naga mani'nazageno, Anumzamo'ma Nagri nagare huno hu'nea naga mani'nazankita, Anumzamo'ma hanimpinti'ma tamagima huno, ruzahu masazama'are'ma tamante'nea so'ezama'agura huama hugahaze. <sup>10</sup> Hianagi kora tamagra Anumzamofu vahera omani'nazanagi, menina Anumzamofu vahe mani'naze. Tamagra Anumzamofu asunkuzana e'orinazanagi, menina tamagra Anumzamofu asunkuzana eri'naze.

<sup>11</sup> Hagi navesima neramantua nena fugta, tamagra zoka vahe mopazmi omne vahekna hutma ama mopafina mani'naze. E'ina hu'negu, tamavufamofu havi avesizamo'ma ha'ma reneramantea zampina uofreho hu'na nagra huneramasamue. <sup>12</sup> Hagi maka kna tamagra megia vahe'mokizmi amu'nompima mani'netma, knare tamavutmava nehinke'za, zamagrama huhavizama huramantesu'za, knare tamavu'tamavaza zamagra nege'za, Anumzamo'ma refkoma hania knarera, ana tamavutamava hu'naza zankura, Agi erisaga hugahaze.

<sup>13</sup> Tamagra Ramofonku hutma, maka kamani vahe'mofu kea amage nentetma, kini vahera ugagota hu'nagu, kezmi antahitama amage nentetma, <sup>14</sup> Gavana vahe'mo'zanema hanaza kea amage anteho. Hazenke hanaza vahe zamazeri fatgo nehuno, fatgoza hanaza vahe husga huzmantesagu huzmantege'za mani'naze. <sup>15</sup> Na'ankure e'inahu tamavutmavama hanazana Anumzamofu avesiza avaririta fatgo nehanageno, ke ontahi neginagi z mavuzmavama

nehaza vahe'mo'za kea osugahaze. <sup>16</sup> Kina vahera omi'nazanki, fru huta mani'nagu, fru huta mani'none nehutma, ana fru tamavutamava zampina antegafita, kefo avu'ava zana osutma, Anumzamofu kazokzo eriza vahe maniho. <sup>17</sup> Maka vaheku husga hunezmantetma, maka zamentintima nehaza tamafuhe'ina zmavesinezmantetma, Anumzamofonku kore hunentetma, kini vahe'mokizmi zamagorga maniho.

<sup>18</sup> Eri'za vahe'motma, kegavama hura-mante'nesaza vahe'mokizmia kore huzmantetma zamagorga nemanitma, fru hu'za knare'ma huramante'naza kva vahe'mokizmi zamagorgagera nemanita, havizama huramantesaza kva vahe'mokizminena zamagorga maniho.

<sup>19</sup> Tamagrama Anumzamofonte'ma fatgo tamagu tamagesa antahitama mani'nenageno, havigema huramante'za tamazeri havizama hanazana, Anumzamo asomu huramantegahie.

<sup>20</sup> Tamagrama haviza hu'nenage'za, havizamofu nona hu'za tamazeri haviza hanazana, mago knare'zana e'origahaze. Hianagi tamagrama knare tamavu'tamavazama nehanage'za, tamazeri havizama hanazana, Anumzamo'a asomu huramantegahie.

*Kraisi avu'avaza negeta avaririsuna zamofu naneke*

<sup>21</sup> Na'ankure tamagrira ana knaza erisazegu tamagi hu'ne. Kraisi enena anahukna huno atazana erino huraveri hu'neankita, Agrama hu'neankna tavutava huta avaririgahune.

<sup>22</sup> ***Agra kumira osuno, mago havigea***

***agipintira osu'ne.*** (Ais 53:9) <sup>23</sup> Hanki Agri'ma huhavizama huntageno'a, zamagrira nona huno huhavizana huozmante'ne, Agri'ma azeri havizama huntageno'a, zamagrira nona huozmanteno zamazeri havizahu kea osuno, Anumzamo fatgo huno refko nehimofu antahi nemino, ana knazana Agri azampi ante'ne. <sup>24</sup> Agra avufare kumiti erino rugeka zafare hantinegu, tagra kumi'ma hu'zampina nefrita, fatgo tavutava'ma huzampina, kasefa huta manigahune. Na'ankure Agri avufgama aguzama ru'nazazamo, tagrira tazeri so'e hu'ne. <sup>25</sup> Na'ankure tamagra sipisipi afukna hutma hazagre'nazanagi, menina tamagra rukrehe hutma sipisipi kva ne, tamagu tamemofu kva Nete e'naze.

### 3

#### *Aravemofu naneke*

<sup>1</sup> Hagi anahukna kante, a'nemotma neramave agorga nemaninke'za, mago'a Anumzamofu kema amagama nontesaza neramave'za nege'za, mago kea osugahazanagi, knare tamavutamavaza nege'za zamagu'a rukrahe hugahaze. <sup>2</sup> Na'ankure tamagra a'nemotma fatgo hutma vetamimofu agorga'a mani'nazagu anara hugahaze. <sup>3</sup> Tamagrama a'nemotma tamazoka'ma ki hariritma golire tamavasese nehutma, kukena nehutma, amega tamavufgare konariri huzankukera osiho. <sup>4</sup> Hianagi tamagu'afi havizama osania avasesezana, fru huno akoheno mani avasese'za hiho. E'inahu avasese zanku Anumzamofona avenesie. <sup>5</sup> Na'ankure korapa



knafima ruotge hu'za mani'naza a'nemo'za, e'inahukna hu'za zmavasesea hu'ne'za, Anumzamo'ma huvempama huzmante'nea zama fore'ma hanigu Anumzamofonte amuha nehu'za, ve'zamimofo agorga mani'naze. <sup>6</sup> Anahukna huno Sera'a Abrahamu amage nenteno, ranimo'e huno Abrahamunkura hu'ne. Tamagra neramave agoraga nemanita knare zanke'ma hanutma, Sera mofane manigahaze.

<sup>7</sup> Hanki vene'nemota knare antahintahi avariritma, a'ne tamimo'zanena so'e hutma maniho. A'nemo'za hanave oti'nagu, knare tamavutmava huzmanteho. Tamagrama antahi'nazana a'nemo'za zamagranena zmasimu erigahaze. E'inahu hutma avaririsageno'a, magozamo'a nunamuma hanaza nunamuntamia rehizara osutfa hugahie.

*Haviza hurantesaza vahe'mokizmi knare tavu-tava huzmantesuna naneke*

<sup>8</sup> Hagi maka'motma magopi fru hutma nemanitma, vahe'mokizmia tamasunku hunezmantetma, kogna hutma nemanitma, tamagu'areti so'e tamavutma nehuta, tamagu'a anteramita maniho. <sup>9</sup> Vahe'mo'za havizama huramantesagetma, nona hutma haviza huozamanteho. Kema huhavizama huramantesageta, nona hutma kea huhavizana huozmanteta, tamagra Anumzamofa antahigenkeno asomu huzmanteno, Anumzamo'ma tamagima hu'neana, e'inahu hanazegu tamagi hu'neankitma, asomura tamagra erisanti haregahaze. <sup>10</sup> ***Iza'o knare hu'na manisue huno agesa nentahino, knare***

**knama kesiazanku'ma avesintesimo'a, kefo kema hu'zankura agefu'na kegava nehuno, agipinti'ma havige huzankura kva hino.** <sup>11</sup> **Kefo avu'avazampintira atreno, knare avu'avaza nehuno, rimpa fruma huno mani'zanku hakeno avaririno.** <sup>12</sup> **Na'ankure fatgo vahe'mokizmia Anumzamo'a avua anteno kegava hunezmanteno, nunamuzmia antahi nezamie. Hianagi havi zamavu'zmavama nehaza vahe'mokizmia, Anumzamo'a zmefi huzamino ha'renezmante.** (Sam-Zga 34:12-16.)

*Knare tavu'tavama hanunazante tata erisuna naneke*

<sup>13</sup> Hagi tamagrama hanavetitma so'e tamavutamava nehnageno'a, iza tamazeri havizana hugahie? <sup>14</sup> Hianagi tamagrama fatgo tamavutamava'ma nehanage'za, tamazeri haviza hugahazanagi tamagra asomu erigahazanki, korera osuta tamazeri kore hanaza zankura antahintahi hakare osiho <sup>15</sup> Hianagi tamagu'afina Kraisina atrenkeno ruotge huno Rana nemanina, tamagrama fore'ma hanigu amuha'ma nehutma tamentintima nehaza zanku'ma tamantahima kesageta, maka knafina tro hutma mani'netma, antahinezamita akohetma fru kefinti kenona hunezmanteta, <sup>16</sup> tamagutamagesafina ama' huta fatgo hutma maniho. E'inahu'ma hanutma, Kraisi'enema knare'ma hutma mani'naza zanku'ma havigema humaneramantesia vahe'mo'za zamagazegu hugahaze. <sup>17</sup> Na'ankure Anumzamofu avesima me'nenigeta tagrama

knare tavu'tava'ma nehanunke'zama, tazeri havizama hanazana, knare hugahie. Hianagi tagrama havi tavutavama hanunte'ma, knama tamisazana havizantfa hugahie.

<sup>18</sup> Na'ankure Kraisi'a maka vahe'mofo kumiku huno, magoke zupa fatgo ne'mo, fatgo osu vahe'motagu fri'neankino, Agra tavareno Anumzamofonte vanigu ahazageno fritegeno, Anumzamofu Avamu'mo azeri otigeno, kasefa huno mani'ne. <sup>19</sup> Agra vuno kina kumapima mani'naza avamutaminte kea ome huama hu'ne. <sup>20</sup> E'i ana avamutamina korapama Noama ventema negigeno, Anumzamofu ke eri atrazanagi, Anumzamo'a akoheno zamavega anteno mani'nea avamutamine. Hankino 8'a naga'moke'za ana timo'ma zamahe refitegeno'a, zamaguravazi'ne. (Jen-Agf 6-8) <sup>21</sup> E'i ana timo'a mono tima frezamofu avame zankino, Jisasi Kraisi'ma friteno oti'neazamofu hanavemo tamagura vazi'ne. Hankino mono tima frezamo'a pehena erinotreanki, agru tagutagesareti Anumzamofoma antahimisunazane. <sup>22</sup> Hagi Jisasi'ma monafinka vuno Anumzamofu azantmaga umani'nege'za, maka ankeru vahe'mo'zane, maka avamutamimozane, maka hanavezmima me'nea zagaramimo'za Agri agorga'a mani'naze.

## 4

### *Kazigazi huta ovesinte avesinte hanuna naneke*

<sup>1</sup> E'ina hu'negu Kraisi'ma avufafima atazama eri'neankna nehutma, tamagra anahukna antahintahi erita maniho. Na'ankure tamagrama

anahu knazama eri'nutma kumi'ma hu'zana atregahaze. <sup>2</sup> Anahukna huno ama avufganema mani'nenuno'a, vahe'mofo havi avesizampina ovugahianki, Anumzamofoma avesizampi vugahie. <sup>3</sup> Tamagra Anumzamofoma keno antahino osu vahekna hutma, zaza kna ama mopafina mani'neta, havi tamagu tamagesa nentahitma, havizamofoma avesizampi nemanitma, negi tina nenetma, ranke huta vano nehuta, ne'za kretma nenetma, havi anumzamofoma mono hunte'naze. <sup>4</sup> Menina korapa arone timimo'za havi tamavutamavara nosazage'za neramage'za, nahige'za tagranena vano nosaze hu'za antri nehu'za, tamazeri haviza huke nehaze. <sup>5</sup> Hianagi zamagra keagama refko'ma hu Jasi nemofonte oti'za, nankna zamavu'zamava hu'nazana nesamisage'za, fri vahe ene kasefa hu'za mani'naza vahe'enena refko huno keaga huzmantegahie. <sup>6</sup> E'i ana agafare Knare Musenkea fri'naza vahete'enena huama hazage'za antahi'naze. Nazano ama zamufare mani'ne'za hu'nesaza zante refko huzmantegahie. Hianagi avamu'zmimo'a, Anumzamofoma avesite manigahie.

<sup>7</sup> Hagi maka'zama vagaresia knamo'a, hago kofta hie. E'ina hu'negu antahintahia hu so'e nehutma, nunamuma hu tamavu'tamava'mofona azeri hanavenetita, kazigazi hutma viho. <sup>8</sup> Maka'zama agatere'neazama hanazana, vaheku'ma ovesinte avesinte hu avu'ava zana otretfa hiho, na'ankure avesinte avu'avazamo'a, rama'a kumi refinete. <sup>9</sup> Mono tamafu tamagnazama esageta, so'e tamavutamavaza hunezmantetma, antahi havizana hutma

ke hakarea huozmanteho. <sup>10</sup> Magoke magokemotma Anumzamo'a so'e musezama'a tami'negu, ana musezanteti rumokizmia so'e tamavu'tamavaza hunezmantenkeno Anumzamofa so'e avu'avazamo'a, tamagripina aviteno vino. <sup>11</sup> Magomo'ma Anumzamofa nanekema huamahu musezama eri'nenimo'a, huama nehina, mago'mo'ma vahe'ma azahu musezama eri'nenimo'a, Anumzamo'ma ami'nea hanavereti vahera aza nehinketa, maka'zama hanazana Anumzamofoma ra agima amizanke hiho. Na'ankure Jisas Kraisi'a masanentake huno hanave'ane mani'ne. Tamage.

*Jisasi'ma hu'neankna huta tataza erisanuna naneke*

<sup>12</sup> Ronenimota tamagra reramahe zampima nevazazamo'a, tevefi viaza nehazagu kasefa'za fore nehie hutma antria osiho. <sup>13</sup> Hianangi ana tamatazama e'neriza zankura muse huvava hiho. E'i anazamo'a Kraisi'ma atama eri'neaza nehazankino, Agrama hanavenentake masa'ane eama hanigetma, magokama muse hanaza zamofa retro huneramante. <sup>14</sup> Hanki Kraisi agi tamagripa me'nenige'za, tamazeri haviza hanazana, asomu erigahazanki muse hiho. Na'ankure hanavenentake masa'ane Avamumo'ene Anumzamo'enena tamagrane mani'ne. <sup>15</sup> Tamagra vahe ahafirizantero, kumazafa sezantero, mago'a hazenkerero, vahe'mokizmi zante tamagena vazige'vazige nehutma, tamata eri'zanku kegava hiho. <sup>16</sup> Hianagi iza'o (kristen) mono vahe'ma mani'nenigeno, atama amisaza zankura

agazegura osino. Hianagi e'i ana mono agima eri'nea zankura, Anumzamofu agi erisaga hino. <sup>17</sup> Na'ankure Anumzamo'ma vahe'ma refko hania kna hago neankino, esera Anumzamo'a Agri'a naga'mota refko hugahie. Hanki tagrite'ma agafama huno refko'ma hanuno'a, Knare Musenkere'ma zamentintima nosaza vahetera, inankna hugahie. <sup>18</sup> Anumzamofu avontafemo'a anage hu'ne, ***Fatgo vahe zamagama'vazizamo'ma amuhoma hanigeno'a, Anumzamofoma atrezama kumima nehaza vahetera, inanknaza fore hugahie?*** (Pro-Knr 11:31)

<sup>19</sup> E'ina hu'negu tamagrama Anumzamofu avesizama amage'ma nentenageno, vahe'mo'za tamatazama tamisageta, tamagri'ma tro'ma huramante'nemofonte tamentintia nehutma, fatgo tamavutamava huta maniho.

## 5

*Mono kva vahe'ene kasefa vahe zamavumro naneke*

<sup>1</sup> Hagi mono kva vahe'motma, nagranena tamagrikna hu'na mono kva ne' mani'nea, Kraisi'a atazana erige'na, ke'nomo'nane, tamagrane magoka Kraisi hanavemo eama hanigeta erisumo'na neramasamue. <sup>2</sup> Sipisipi kva vahe'mota, Anumzamofu sipisipi kevu naga'ma kegavama hanazana, vahe'mo higure huta osutma, tamagu'areti Anumzamofu avesi'mo'ma hu'nea kante kazigazi hutma kegava nehutma, havige hutma zagoma tro hukazigatira anara osiho. <sup>3</sup> Tamagri kvafima mani'naza vahetera, ra

vahe mani'nonankita kegava huzmantegahune hutma ana vahekura osiho. Hianagi knare tamavu'tmava'za huzmaveri nehinke'za nege'za, tamavaririho. <sup>4</sup> Hagi Kraisi'ma ugota Sipisipi kva ne'ma efore'ma hania zupa, hanave'amo'a vagaore kini fetori eme tamigahie.

<sup>5</sup> Hagi kahefa vahe'mota, anahukna hutma ugagota huramantenesaza ra vahe'mokizmi naneke antahizmita zamage anteho. Maka'motma anterami tamavu'tamavara kukena hiaza nehutma, rumokizmi zamagorga umani emani hiho. Tamage huno avontafemo'a anage hu'ne, **Zamagra zamavufgama erisaga haza vahera Anumzamo'a ha'renezamanteno, zamavufgama anteramiza mani'naza vahera knare hunezmante.** (Pro-Knare nomaniza 3:34)

<sup>6</sup> E'ina hu'negu tamagra Anumzamofu hanave-mentake azampi anteramita mani'nenkeno, kna fatgore tamazeri antesga hino. <sup>7</sup> Hakare'a knazantmia Agrite atreho, na'ankure Agra tamagrira kva huneramante. <sup>8</sup> Tamagra negia onetma, kva hutma maniho. Ha' vahetamimo Sata'a agra laionigna huno akoheno rerakaureno krafa huno vano nehuno, ahenoma nesia vaheku nehake.

<sup>9</sup> Hu'neanagi, tamentinti azeri hankavetineta, Satana retufe atreho. Antahi'naze, Anumzamofu amage nentaza vahe'ma, mika kaziga tamafuhe'zane tamasarahehezane mago'zahu knazane, zamata zana e'nerize. <sup>10</sup> Hanki atupa'a knafi tamatazana erigahazanagi, tamagri'ma Kraisi manivava masa'afima tamagima hu'nea

Anumzamo'ma tamazeri knaretfa nehuno, knare hu'naze huno huneramanteno, tamazeri hanavetina, oti hanavetita manigahaze. <sup>11</sup> Maka hanavea Agrite me'nenno, mevava hugahie. Tamage.

*Vagare naneke*

<sup>12</sup> Hanki Sailasi'a nazahigeta ama atupa avona kre'no'e, nagrama kena antahinama agri'ma huana, fatgo huno Ramofona amage nentea nenafu mani'ne. Nagra ama atupa avoma kreneramuana, tamazeri hanaveti ke hu'na, Anumzamofa tamage asunku zankura kreneramuanki, ana asunku zantera oti hanavetiho. <sup>13</sup> Anumzamo'ma huhampri zamantege'za, Babilonima mani'naza naga'mo'za, musenke atreramantaze. Maki'a nagri mofavreni'agna hu'nemo'a, musenkea atreramante. <sup>14</sup> Magoke magoke'motma fatgo huno ruotge hu'nea avu'ava hutma, agi ohene ahene hutma maniho. Kraisimpima mani'naza nagamotma, rimpa fruzamo'a tamagrane mesie.



**Anumzamofu Ruotage Avontafere**  
**The Holy Bible in the Kamano-Kafe language of Papua**  
**New Guinea**  
**Buk Baibel long tokples Kamano-Kafe long Niugini**

copyright © 2022 Tyndale Bible Translators

© Tyndale Bible Translators

Language: Kamano-Kafe (Kamano)

Translation by: Tyndale Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-02-08

---

PDF generated using Haiola and XeLaTeX on 21 Feb 2024 from source files dated 13 Dec 2023

f1057ba4-e8d1-53e3-baf9-315ebf4a8836